

共同經課 - 1 耶利米書八章十八節～九章一節

18 我有憂悶，情願會得安慰；我的心暈去。19 看啊，我的百姓哀傷的聲對遠遠的所在來，講：耶和華無佇錫安嗎？伊的王無佇彼內面嗎？in 啥事用雕刻的偶像，及外邦虛假者來激我的受氣啊？20 收成的時已經過，夏天的日已經盡，阮猶無得著救！21 因為我的百姓的毀傷，我亦受毀傷。我盡在哀傷，驚惶擒住我。22 佇基列豈無乳香？佇遐豈無醫生？我的百姓怎樣袂得著醫好？1 願我的頭殼做水泉，我的目睷做目屎的源頭，我通為我的百姓中受創的人，日暝啼哭。

共同經課 - 2 詩篇七十九篇一節～九節

1 〔亞薩的詩。〕上帝啊，外邦人進入你的產業，拍拉慘你的聖殿，互耶路撒冷變成土堆，2 in 將你的奴僕的身屍交互空中的飛鳥做食物，將你聖的百姓的肉交互地上的野獸，3 佇耶路撒冷周圍流 in 的血親像水，亦無人埋葬伊。4 阮互阮隔壁國所凌辱，互阮四圍的人冷笑譏刺。5 耶和華啊，你的受氣欲偌久，到永遠嗎？你的受氣欲親像火晝嗎？6 願你將你的受氣傾落佇許個毋識你的外邦，以及許個無求叫你的名的列國。7 因為 in 吞食雅各，互伊倚起的所在拋荒。8 求你毋通記得阮的祖公的罪，來對阮討；願你的慈悲緊緊臨到阮，因為阮落到極卑微的地位。9 救阮的上帝啊，求你因為你的名的榮光幫助阮！因為你的名的緣故救阮，赦免阮的罪。

共同經課 - 2 詩篇四篇

1 〔大衛的詩交互樂官；用絲弦的樂器。〕顯明我的義的上帝呀，我求叫的時，求你應我！我佇困苦的中間，你曾互我寬闊；今求你憐憫我，來聽我的祈禱！2 恁諸個上等人啊，將我的榮光變做凌辱欲到底時？恁意愛空虛，搜尋無影跡，欲到底時？（細拉）3 恁著知，耶和華已經分別敬虔的人做伊家己的；我求叫耶和華，伊欲聽我。4 恁著驚惶，毋通犯罪；佇眠床裡，心著三思，亦著肅靜。（細拉）5 著獻義的祭，亦著倚靠耶和華。6 多多人講：是誰會指示阮甚麼好處？耶和華啊，求你用你的面的光，來照阮。7 你互我心內有歡喜，贏過人得著多多五穀及新酒的時。8 我欲安然倒啲暍，因為只有耶和華——你互我安穩倚起。

共同經課 - 3 提摩太前書二章一節～七節

1 所以我所勸勉的，第一就是替眾人懇求、祈禱、求恩、祝謝；2 替諸個王及攏總的官府求，互咱凡事敬虔、端莊，通安然恬靜來過日。3 這是好，閣得著接納佇救咱的上帝的面前。4 伊愛眾人得著救，也深知真理。5 因為上帝是一個，上帝及人的中間，中保也是一個，就是做人的基督耶穌；6 伊為著眾人獻本身，做替贖的價錢，有及時證明。7 因為按呢我受設立做宣傳的，做使徒，用信用真實做外邦的教師，我所講是真實無白賊。

共同經課 - 4 路加福音十六章一節～十三節

1 耶穌閣對學生講：「某個好額人有一個管家的，有人將伊破費主人的業對伊的主人告伊。2 主人叫伊來，給伊講：『我所聽見你此個代誌是怎樣？今你管家的事著及我清楚，因為你袂會猶原做管家。』3 管家的心內想講：『主人搓(lut)我管家的職，我欲怎樣啊？抬鋤頭？無氣力；做乞食？乜(mī)見誚。4 今我知所著做啦，到搓(lut)管家的職，彼時人才欲接納我入 in 的家。』5 伊就叫欠伊主人的債的，一個一個來，給頭一個講：『你欠我的主人偌多？』6 應講：『油一百桶。』就給伊講：『提你的數，緊緊坐，寫五十。』7 閣給別個講：『你欠偌多？』伊講：『麥一百石。』給伊講：『提你的數，寫八十。』8 主人就謳佬此個不義的管家為著伊所做有智識；因為此世間的人，為著世情來圖謀，比光明的人卡有智識。9 我也給恁講，著用不義的錢財結交朋友，到錢財了去的時，in 才欲接納恁入永遠的帳房。10 佇至小可的事盡忠的，佇大的也盡忠；佇至小可的事不義的，佇大的也不義。11 佇不義的錢財恁若無盡忠，是誰欲用真的託仗恁？12 閣佇屬別人的恁若無盡忠，是誰欲用屬恁的互恁啊？13 一個奴僕袂會服事二個主人；因為伊會怨恨此個，疼彼個。抑是會對重此個看輕彼個。恁袂會服事上帝，續服事錢財。」